

欽定剿平粵匪方略

欽定剿平粵匪方略卷二百七十五 辛酉年

九月二十三日

戊申

瑞昌王有齡奏言逆匪圍攻

嚴州府城經張玉良派副將劉萬德等分紮北
峯塔山埡口烏石灘等處因賊勢過衆都司張
元勝營盤被陷諸軍退守城內其七郎廟等處
之賊經官軍分投擊剿疊有斬獲城圍尙未能
解浦江縣城被圍後總兵文瑞等嬰城固守屢

出奇計踏毀西南北門外賊營多座饒廷選派
令各軍於鄭義門紮營進剿該逆大股由山徑
抄襲賊衆兵單以致全軍皆潰退至諸暨縣城
饒廷選骹受槍傷手斬數人不能禁止現在招
集潰軍暫駐布穀辟水二嶺及虎頭山等處再
圖進攻據饒廷選查明首先潰退之外委李楸
享余絢綵卽於軍前正法相應將管帶不力之

參將王興棠等分別開列請

旨懲辦都司曾鵬舉張元勝李恆清三員棄營而逃
除曾鵬舉張元勝現已力戰陣亡毋庸議外李
恆清請俟查獲卽行正法所有陣亡之守備沈
成霖等十一員容彙案請卹浙江提督饒廷選
統領援軍紀律不嚴應請

旨交部嚴加議處奏入

上諭內閣曰賊竄嚴州浦江尙未解圍所有赴援不力首先潰退各員弁除外委李傑享余絢綵業經軍前正法外參將王興棠劉金標遊擊莊廷禮都司郭連城張明守備蘇吉良千總周連高吳春瑞著一併革職暫留軍營千總高桂雲著拔去藍翎革去都司銜以外委留營效力嚴州前次潰退之副將劉萬德遊擊尹沛霖都司何朝倫楊繼昌于

海晏劉廷玉陳步桂張國楨守備楊占魁著一併革職副將陳步高前次嚴州失守案內本應發往軍臺此次復經失守營盤著從重發往新疆效力贖罪仍與劉萬德等九員均暫留軍營責令帶罪圖功以觀後效棄營不守之都司艾金魁李恆清把總虎懷棟畏罪潛逃著瑞昌等通飭各屬嚴拏務獲就地正法浙江提督饒廷選統領全軍紀律

不嚴以致潰敗咎有應得著交部嚴加議處

二十七日壬子薛煥奏言嘉定賊首賴逆糾蘇州

賊黨蕭逆於九月初二日自南翔直撲野雞墩

分股犯華漕諸翟臣卽令上海縣知縣劉卹膏

等分路防剿立解野雞墩之圍乘勝抄至華漕

復將賊衆擊退華漕之圍亦解另股竄撲諸翟

野雞墩華漕兩處敗匪從後抄至合而爲一千

總吳永敖等催軍衝突該逆四面堯裏逆黨愈
添愈衆外委馬俊三紮營前敵被圍尤急糧食
軍火垂盡王國安用木罌缶裝盛乾餼藥彈於
深夜密遣健卒舁水潛送入營諭令堅守勿卻
一面稟請濟師臣飛飭參將姜德由寶山進攻
嘉定牽制賊勢並派千總晉珍等往援諸翟初
七初八兩日各軍與賊相持頗有斬獲賊復分

竄七寶鎮大肆焚掠劉鄣膏督率勇團分紮要
路賊仍退回諸翟臬司湯雲松督帶親軍居中
策應各路官兵勇氣倍增將賊營一律踏毀馬
後三營之圍立解該逆遁回嘉定當諸翟各營
被圍時臣飭副將李恆嵩等赴援詎該逆已竄
踞蟠龍鎮隔絕泗涇之路參將姚紹修擊賊於
徐涇頗有斬獲因蟠龍鎮賊匪衆多兵單不能

前進而青浦之賊復由劉夏鎮竄至朱方橋等處偪近泗涇又有大股由鳳凰山而來撲犯塘橋並從陳方橋撲廣富林意在窺伺松江府城李恆嵩先派千總黃士林等赴泗涇助勦又派遊擊李永長接應一面飭都司王玉林等分禦塘橋廣富林之賊派遊擊林叢文駐紮大橋以固郡城門戶署提督曾秉忠復親赴泗涇布置

猝遇水陸大股賊匪其時姚紹修等均已擊賊
獲勝聞信馳至分投進擊斃賊甚多各軍進至
蟠龍鎮知湯雲松已解諸翟營圍曾繼榮等均
卽回至泗涇李恆嵩派隊擊退塘橋之賊卽於
是夜督軍前赴陳方橋一帶分路兜擊該逆見
我軍聲威甚壯不敢拒敵方家窰一帶均無賊
蹤臣查嘉定青浦之賊先後出竄加以蘇城逆

援屬至意圖撲犯松江上海我軍分防多處兵力殊形單弱猶幸將士用命得以轉危爲安惟賊蹤飄忽靡常難保其不去而復來且金山衛城及柘林張堰等處地方遼闊防不勝防平湖乍浦之賊又復紛紛出竄金山奉賢南匯等邑仍覺空虛臣惟有竭盡心力設法堵禦以力保完善之區奏八報

聞

三十日 乙卯 大學士湖廣總督官文湖北巡撫李

續宜奏言 臣等調派各軍圍攻黃郡疊獲勝仗

八月二十四日夜克復黃州府縣城池業將大

概情形先行奏報在案查逆匪踞守黃州府城

經官軍水陸相繼進剿該逆施放槍礮各營官

軍緣梯而上分道殺入卽將黃州府縣城池克

復生擒逆匪二千餘名奪獲器械羸馬甚多其
敗竄之匪復經官軍沿途進剿共斃賊八千餘
名生擒一千餘名溺水死者無算其竄逸賊匪
又經官軍分路搜殺計斃二千餘名黃郡踞逆
恃其城堅糧足死守待援臣等前於克復安慶
桐城大捷後節經添調水陸各軍擊退下游援
賊設計攻克堅城盡殲醜類實足以寒逆膽所

有尤爲出力之候選道蔣凝學等先行開列願
懇

恩施陣亡千總王華益請

飭部從優議卹其餘出力員弁兵勇容臣等查明奏
請鼓勵陣亡受傷各弁勇一併查明辦理奏入
上諭內閣曰此次官軍乘克復安慶桐城大勝之後
設計攻克堅城盡殲醜類洵足以寒賊膽而快人

心官文李續宜調度有方殊堪嘉尙其尤爲出力
之候選道蔣凝學著交軍機處記名遇有道員缺
出請旨簡放並賞加布政使銜知府毛有銘著免
選本班交軍機處記名遇有道員缺出請旨簡放
遊擊賀三元著以參將儘先補用並賞加副將銜
賞給嚴勇巴圖魯名號參將王臨祥著以副將儘
先補用並賞給彥勇巴圖魯名號都司羅盛典著

以參將儘先補用並賞給策勇巴圖魯名號副將
銜李續燾著以副將儘先補用並賞還圖薩泰巴
圖魯名號副將李白袞著賞給戰勇巴圖魯名號
遊擊王允昌著免補遊擊以參將儘先補用並賞
給績勇巴圖魯名號佐領花凌阿著交軍機處記
名遇有副都統缺出請旨簡放副將何紹彩著免
補副將交軍機處記名遇有總兵缺出請旨簡放

補用知府唐協和著俟補缺後以道員卽補並賞
加鹽運使銜總兵成大吉著交軍機處記名遇有
提督缺出請旨簡放並賞給盛勇巴圖魯名號副
將左光培著交軍機處記名遇有總兵缺出請旨
簡放並賞給爽勇巴圖魯名號成發翔著交軍機
處記名遇有總兵缺出請旨簡放參將王吉著免
補參將以副將遇缺儘先選用丁長春著以副將

遇缺儘先選用並賞給固勇巴圖魯名號遊擊曾
紹霖著免補遊擊以參將儘先選用遊擊唐瑞廷
著以參將遇缺儘先推補謝泰平著免補遊擊以
參將遇缺儘先補用以上三員並著賞加副將銜
軍功劉維楨獻城歸順並設計殺賊志甚可嘉著
以都司儘先卽選並賞戴花翎陣亡千總王華益
著交部從優議卹其餘在事出力文武員弁兵勇

仍著官文李續宜查明保奏候朕施恩

官文李續宜又奏言臣等調派水陸馬步各軍
進駐皖境力攻懷桐爲東征要著仰賴

聖主威福於八月初一日克復安慶省城初三日克
復桐城縣城伏思安慶桐城被賊盤踞已歷九
載實爲皖楚咽喉南北樞紐所關甚大連年楚
軍血戰智取力攻備嘗艱苦傷亡將士甚多今

幸成此大功皆賴多隆阿調度合宜智勇冠軍
楊載福沈毅有謀所向克捷又副都統舒保忠
勇善戰上年策應懷桐疊獲勝仗今春回援武
漢攻克孝感德安厥功亦巨皆將領中不可多
得之員臣等不敢壅於

上聞合無仰懇

天恩將多隆阿等給予優獎以昭激勸之處出自

逾格鴻慈奏入

上諭內閣曰所有調度合宜所向克捷之幫辦軍務
頭品頂戴福建福州副都統多隆阿著賞加都統
銜遇有都統將軍缺出請旨簡放鑲黃旗漢軍副
都統舒保著賞加都統銜福建水師提督楊載福
著交部從優議敘

李續宜又奏言臣以皖臬蒙

恩超授安徽巡撫感激涕零懼乏報稱適逆黨上竄鄂垣前湖北撫臣胡林翼臥病太湖臣以鄂爲東南根本不得不帶兵赴援先其所急原期速靖鄂疆卽行回皖無如賊勢蔓延刻難殄滅撫躬自責焦灼難名茲幸鄂省各屬漸就肅清隨州孤城旦夕可拔臣以爲不久卽可東下以盡官守而救瘡痍不料前撫臣胡林翼自回援後病

勢日篤陳請開缺蒙

皇上命臣暫署撫篆惟念皖中軍事孔棘百倍於鄂
避難就易臣心實有未安現值安慶初克亟宜
乘此軍威殲除醜類慎選賢能問民疾苦以期
綏定勞來藉紓

聖主子惠元元之至意至湖北近年軍餉支絀積欠
約四百餘萬若非力清前路復民故業以開財

源饑潰甚屬可虞且皖爲鄂之門戶皖賊一日
未滅鄂卽一日不安表裏相依實有不能不亟
圖之勢況臣之胞兄李續賓進規廬州戰歿三
河殉難者逾五千人

國憤家仇此尤臣伏干枕戈寤寐不忘者也臣部
下兵勇現擬飭令將弁移赴楚皖之交扼要駐
紮再四思維惟有籲懇

天恩准臣仍回安徽本任效犬馬之勞成區區之志
雖粉身碎骨不足圖報奏入

上諭內閣曰前經降旨將李續宜調補湖北巡撫駐
紮湖北安徽交界地方督辦軍務茲據李續宜奏
皖中軍務百倍於鄂懇請仍回安徽本任等語自
係尚未接奉前旨李續宜著仍遵前旨駐紮湖北
安徽交界地方督辦軍務以專責成

同日曾國藩奏言鮑超一軍在豐城西岸大獲勝仗該逆退出豐城後大股盤踞白馬寨小塘墟西竹墟等處分股竄小江口大江口一帶鮑超於七月二十七日過河進剿白馬寨小塘墟一帶之賊沿山抄擊該逆紛紛敗竄我軍連日追擊該逆另股圍攻撫州府城知府鍾峻等登陴固守八月初四日鮑超一軍進至城下撫州

之圍立解該逆望許灣大路而逃先是七月下旬安慶援賊多而且悍臣調鮑超馳援江北該鎮於初五日兼程回援初十日行抵距省四十里之武陽渡始知安慶業已克復乃遂星夜折回於十四日再抵撫州查得該逆大股已竄往貴溪雙港湖坊河口一帶會合湖坊之花旗廣匪三股賊衆號稱二十餘萬蔓延數百里層層

築壘意圖回竄並分股竄往弋貴廣信一帶鮑
超於十五日自撫郡進兵冒雨遄行二十日馳
抵貴溪貴溪之賊聞風逃遁二十二日五鼓鮑
超率隊進剿卯刻行抵雙港逆首僞忠王李秀
城先由河口率衆至湖坊勾結噶天豫朱逆觀
天燕童逆勒天福余逆享天祿黃逆並花旗廣
匪等股整隊迎敵洶湧如潮鮑超飭宋國永等

分路抄擊自卯至巳鏖戰三時該逆大敗拋棄
器械奪命狂奔我軍追殺六十餘里沿途斃賊
一萬餘名墜巖落澗死者尤多將雙港九思巖
同河口湖坊一帶賊壘七十餘座全行踏平生
擒長髮老賊近二千名訊明正法追至河口該
處踞賊一併驅逐是夜探馬回稱湖坊河口之
賊敗往鉛山者皆盤踞於東門外三十里之梓

溪一帶意欲勾通城賊抗拒官軍四鼓時鮑超率領馬步全軍進攻鉛山卽刻已抵城外該逆於北門外堅築七壘與城內之賊相爲犄角鮑超飭令熊由立譚勝達分投攻壘擁入濠邊先將左路賊壘踏平旋將右六壘鏟毀壘中之賊盡數殲除各營乘勝過河分段攻城賊於城上施放槍礮相持兩時之久鮑超親執桴鼓火箭

燃燒城內藥桶賊衆慌亂副將譚勝達卽緣梯
登城該逆見勢不支潛開東門逃走我軍先登
者立開北門各營一齊入城當將鉛山縣城克
復追殺六十餘里賊屍徧野生擒老賊八百餘
名將梓溪一帶踞賊全行勦洗馬隊追過廣信
立解郡圍伏查閩賊三起與花旗廣匪先後由
建昌竄至廣信盤踞雙港九思巖河口湖坊鉛

山一帶兩月有餘蔓延極廣又加僞忠王一股
由撫州肆竄該處併聚一路經鮑超痛剿兩日
埽平賊壘八十餘座克復鉛山縣城周圍追擊
二百餘里風馳電掣洵足以彰

天討所有陣亡之都司王友得等請

旨交部從優議卹尤爲出力之儘先副將譚勝達等
先行開列額懇

恩施

曾國藩又奏言總兵鮑超驍勇罕匹轉戰安徽
湖北江西三省所向克捷本年正月破黃汶金
大股於洋塘四月破劉瑯琳大股於安慶厥功
甚偉其部下各營官如豐城案內隨摺請保加
提督銜之候補總兵宋國永陳由立黃慶請保
升補總兵之婁雲慶張玉田等皆沼陣衝鋒戰

功卓著此次克復鉛山縣城連解撫州廣信兩
郡之圍竭力奔馳不得少休未滿兩月將江西
腹地各賊一律埽除全省肅清實屬勞苦功多
可否籲懇

皇上特恩將鮑超補授提督實缺抑或另有
恩獎之處恭候

聖裁其所部之候補總兵宋國永陳由立黃慶婁雲

慶張玉田等均請以次補授總兵實缺以示懋
賞而勵戎行奏入

上諭內閣曰此次鮑超一軍追剿股匪大獲勝仗克
復鉛山縣城生擒老賊八百餘名梓溪踞賊全行
剿洗洵足以彰天討所有陣亡之都司王友得黃
友勝守備周有勝千總趙勝武封樂善把總高林
芳外委李安旺方祥應外委鄒富友蕭於成周鳳

祿均著交部從優議卹其尤爲出力之副將譚勝
達著賞加總兵銜並賞給協勇巴圖魯名號協領
明興著以副都統記名簡放並賞給法什尙阿巴
圖魯名號副將李文益著賞給客勇巴圖魯名號
劉玉堂著賞給才勇巴圖魯名號劉順隆王衍慶
熊鐵生均著賞加總兵銜直隸州知州伍華瀚著
免補直隸州知州以知府留於四川遇缺卽補並

賞給鋒勇巴圖魯名號鮑繼高著免補本班以知
府留於湖北遇缺卽補參將李定貴著免補參將
以副將儘先補用並賞給效勇巴圖魯名號唐仁
廉翦炳南均著以副將儘先補用記名提督鮑超
著交軍機處遇有提督缺出儘先提奏總兵宋國
永陳由立黃慶婁雲慶張玉田均著交軍機處遇
有總兵缺出提奏以昭懋賞

曾國藩又奏言安慶克復以後臣移紮省城諸
務紛集無一司道大員分任其實實有叢脞不
勝之虞查向來定例隨總督駐紮江甯者有布
政使一員糧道一員鹽道一員隨皖撫駐紮安
慶者有布政使一員按察使一員近因兩省淪
陷本缺各員僑駐淮揚泗潁等處臣忝任江督
年餘無司道一員相隨雖佐雜微員必須親自

札委刑名錢穀必須親自綜覈不特體制不合亦且精力難周若不急爲部署深慮親細務而誤大局再四籌思擬於安慶省城酌派司道數員分任其責如江甯布政使王夢齡現在署理漕運總督駐紮淮安應另派一人署理該缺隨臣同駐安慶管轄上游印委各員凡蘇省官員距潁州太遠者升遷調署由該司權代詳辦又

如安徽按察使張學醇現在駐紮臨淮聲息不通應另派一人署理該缺同駐安慶管理安池徽等郡刑名驛傳事務又如江安糧道王朝綸現在代辦江北糧臺駐紮揚州應另派一人署理該缺同駐安慶專管皖省七府漕糧事件該缺之職向章本管蘇糧三府皖糧七府也又如江甯鹽巡道邢春第現未到任亦應另派一人

署理該缺同駐安慶專管淮鹽事件此四缺者
分別處置庶幾職有專司思不出位臣得官盛
任使之效庶幾專心軍旅用志不紛聞或馳赴
各府巡察營務亦不至拋廢公事實於軍務地
方兩有裨益擬俟遴選得人再將四缺陸續奏
派署理請

旨遵行奏入得

旨允行

同日巴棟阿馮子材奏言據探報丹陽新豐之賊竄至鹽街楊村等處經臣等先派提督賴鎮海率所部師船兼督金山陸營嚴備高資一帶以防龍潭下蜀街等處之賊嗣派總兵富升等分伏甘棠橋左右而以副將文龍德等帶馬步隊一千名令其繞伏馬陵截擊敗賊並派參將

林從泰等於甘棠橋東誘賊十八日黎明賊衆約六七千徑撲鎮城至甘棠橋追我遊騎富升見賊過橋揮軍截賊爲兩林從泰江有貴等合圍痛勦追至馬陵文龍德等迎頭截住賊衆越岡墮澗伏屍枕藉是日計獲耳級百餘隻旗械無算惟丹陽逆酋袁賊素稱狡悍聞此股賊敗卽糾合寶堰龍潭各股屯踞鹽街楊村臣等派

已革總兵蕭知音等督率隊伍於三鼓進發馳抵鹽街文龍德林從泰乘夜率所部繞出楊村之後楊青山關松志扼丹陽大路陶茂森蕭知音分由鹽街楊村兩頭新柵攻入賊蒼黃失措我軍短兵斫刺斃賊無數袁逆知楊村全沒來援不意官軍突出其後不戰自潰於是兩處賊黨奪路望丹陽而逃楊青山等節節攔殺除騎

聞

賊拌死馳脫其餘漏網甚少我軍直追至丹陽
湖畔惟據探報逆渠李秀城又率悍黨號稱十
餘萬意圖攻撲鎮郡臣等以鎮城乃江南要地
北岸屏藩惟有激勵官軍力圖堵剿奏入報

欽定剿平粵匪方略卷二百七十六 辛酉年

十月初一日

丙辰

毓科奏言逆匪李秀城自豐城

下竄分擾南昌等縣經總兵鮑超沿途抄襲該
逆併竄撫州圍攻城池復經道員劉于濬等擊
退城圍立解其東鄉之賊經知縣周溯賢擊退
後復勾合進賢之匪由安仁渡河直撲貴溪縣
城又經官兵轟擊旋即敗退至分竄弋陽興安

等縣之匪經鮑超跟蹤追勦將雙溝等處賊壘
悉數踏平並將鉛山縣城收復知府張詩華等
勦辦瀘溪興安之匪先後設計攻擊各將城池
克復臣查此次勦賊官兵及地方守城文武均
屬異常出力應行開列籲懇

恩施分別給予獎勵奏入

上諭內閣曰此次撫州等城解圍並克復諸山等縣

城池出力之副將顏紹榮等均著賞加總兵銜道員劉于濤著以按察使記名簡放縣丞劉于浚著以知縣不論雙單月卽選並賞戴藍翎知縣朱景伊著以直隸州知州儘先選用並賞戴藍翎守備施從善等均著以遊擊升用並賞換花翎副將蔡康業著以總兵升用遊擊謝得龍著以副將升用熊克勝著賞加副將銜都司黃名揚著賞換花翎

並賞加遊擊銜知府張詩華著賞加道銜參將顧
雲彩著以副將補用都司定凱著以遊擊留於江
西補用知縣馬修良著賞加運同銜並賞戴藍翎
楊長杰著賞換花翎署鉛山縣知縣張兆熙署都
司艾連陞隨同克復縣城所有失守處分均著免
其查辦陣亡之守備劉錫榮等均著交部從優議
卹

據科又奏言臣前因賊匪逼近省垣札調參將
韓進春分撥營勇來省嗣因賊由臨江東竄擾
及豐城又經飛催截擊乃該參將始以兵數單
薄稟覆繼復因病請假不遵調遣相應據實奏
案請

旨將花翎副將銜候選參將韓進春拔去花翎卽行
革職仍留軍營以觀後效儻復不知愧奮卽當

從嚴叅辦奏入

上諭內閣曰參將韓進春經毓科派令擊剿賊匪乃以兵單爲詞不卽起程繼復因病請假實屬不遵調遣副將銜候選參將韓進春著卽革職拔去花翎仍著暫留軍營以觀後效儻再不知愧奮卽行從嚴叅辦

初九日

甲子都興阿奏言天長踞匪分擾銅山等

處九月初八日竄至陳家集地方經總兵詹啟
綸親督馬步各隊分路抄擊斃賊甚多生擒悍
賊十九名餘衆聞風退遁其下游江面之賊亦
經總兵周希濂等先後擊退其江陰賊船竄至
黃山港等處又經遊擊郭定猷等就近轟擊燒
燬賊船三十餘隻斃賊不計其數近聞南岸逆
賊搶擄民船意欲北渡臣惟有檄飭各軍分扼

水陸要隘嚴加防範以期固守江北藩籬奏入
上諭內閣曰此次水陸官軍勦賊獲勝著都興阿嚴
飭各軍分扼要隘乘勝進剿毋任分竄以清江面
同日毛鴻賓奏言粵匪由黔西竄出分擾四川
之江津等縣地方徑撲黔江縣城逼近來鳳縣
境臣卽飛飭永順府協迅撥兵練馳往龍山扼
紮並分咨鎮軍各營派兵策應其澧州防務卽

咨提臣周寬世就近督辦至逆首石達開久伏
粵西其黨與雖陸續竄出而悍賊之相從者尙
復不少本年收復潯州敗匪竄至慶遠府屬之
里苗地方該處可由羅城直達融縣爲上年彭
大瞬等股匪竄楚舊路石逆兇狡異常若使關
入邊境則東窺江右西伺川南皆足爲患查青
林隘有副將周洪印駐守道員江忠義所部亦

拔同新甯臣現飭知府席寶田等迅赴永州聯絡聲勢兼顧東西兩路復調同知魏喻義一軍扼守四眼橋與粵軍會合夾擊奏入

上命議政王軍機大臣傳諭駱秉章田興恕毛鴻賓曰粵匪由黔竄蜀繞偪楚疆四川之涪州等境均被匪擾石逆大股復收合潯州餘黨竄至慶遠府屬之里苗地方可由羅城融縣窺伺楚境毛鴻賓

已飭各地方文武分投堵禦尤須鄰省通力合作
方足以遏賊鋒著駱秉章田興恕於川黔賊勢所
趨之地亟派兵勇分投追截與楚境各軍前後夾
擊並著毛鴻賓督飭帶兵各員不分畛域會合川
黔各軍實力防剿

十二日丁卯巴棟阿馮子材奏言丹陽逆匪由新

豐進偪鎮城經總兵陶茂森等督率水陸各軍

分路迎剿九月二十八日參將林從太等由東石村進剿賊黨山村迎拒其西石村之賊亦卽遙擁來援我軍奮力攻擊賊勢大潰適鹽街一股亦爲遊擊楊青山等擊敗該逆奪路狂奔我軍會合追擊沿途斬殺甚多其橫山之賊亦經參將田慶和等併力剿殺斃賊無算統計生擒悍賊三十餘名奪獲旗幟器械多件新豐之賊

已於是夜遁回丹陽此次尤爲出力各員應行
開列仰懇

天恩分別給予獎勵奏入

上諭內閣曰此次逆匪復犯鎮城官軍迎剿獲勝尤
爲出力之參將林從太楊青山均著免補參將以
副將儘先補用都司江有貴著以遊擊儘先補用
守備楊安龍著免補都司以遊擊儘先補用外委

陶世洪傳宗得均著免補把總以千總儘先補用

十三日
戊辰

上諭內閣曰軍興以來於今十載百姓慘罹兵燹顛沛流離我

皇考大行皇帝勤求民瘼命將出師

宵旰焦勞無日不欲出斯民於水火是以

軫恤戎行訓勵將士多方誥誡至再至三卽一戰之捷

一城之拔無不立沛

恩施俾知感奮凡所以整軍經武期與斯世共樂昇平
者固天下臣民所共見共聞也各路帶兵大員身
受

皇考厚恩畀以重任果能各矢公忠滅此朝食奮茲小
醜豈難迅速蕩平乃近來將帥中深明紀律所向
有功者固不乏人而沾染積習者亦復不少或粉

飾奏報或觀望遷延賞罰則輕重失平糧餉則侵
漁入己甚至意見不和以至事機坐失縱寇殃民
種種貽誤朕卽不重治其罪伊等清夜自思其能
仰答

先帝之恩否耶嗣後各路統兵大員務當勦力同心痛
懲諸弊嚴明賞罰以勵軍心愛養士卒以聯衆志
毋分畛域致此勦而彼竄毋事欺罔致掩罪而冒

功僞能同仇敵愾迅奏膚公則行賞論功朝廷自有酬庸之典如敢仍前玩泄或軍無紀律以致騷擾良民則典刑具在朕亦不能曲法以示恩也將此通諭各路統兵大臣督撫提鎮知之

十五日庚午馮子材奏言署江甯將軍京口副都

統巴棟阿辦理鎮江軍務籌防籌勦不遺餘力旋以積勞成疾於九月二十日因病出缺現當

軍務喫緊之時相應請

旨簡放熟悉東南情形之大員星速來鎮以重職守
並懇

恩飭部將巴棟阿照軍營病故例從優議卹

馮子材又奏言丹陽句容等處賊黨日增逆首

陳玉城由金陵率賊四五萬會合各股聚集寶
堰白兔地方逆目滿天義又帶有宜興溧陽金

壇賊衆二萬意圖合撲鎮城亟應乘機勦辦惟
一經進兵則根本之地必賴大員鎮守臣查前
署大名鎮總兵馬德昭現在清淮就醫病已痊
愈該總兵練達戎機威望素著與臣共事多年
知之最深現當防勦喫緊之時合無仰懇

天恩俯准以總兵馬德昭幫辦鎮江軍務俾臣得資
臂助實於軍務大有裨益如蒙

俞允臣卽知照該總兵速赴鎮防奏入

上命議政王軍機大臣傳諭馮子材曰丹陽等處賊數日增逆首陳玉城等意圖合撲鎮城自宜乘機進剿爲先發制人之計該總兵督辦軍務責無旁貸著卽激勵兵勇分路進攻一面固守鎮城勿得稍有疏失並知照馬德昭令其速赴鎮城幫同辦理會商戰守機宜鎮江與揚州兩城僅隔一江現

當鎮防喫緊之時已將都興阿調補江甯將軍並
諭令該將軍隨時探明緩急相機策應該總兵務
宜與江北軍營聯絡一氣以期互相援應毋誤事
機

上又命議政王軍機大臣傳諭都興阿曰本日據馮
子材奏署江甯將軍京口副都統巴棟阿病故已
明降諭旨將都興阿調補江甯將軍仍在揚州軍

營辦理江北軍務矣現在京口駐防兵丁並無旗
營大員管轄馮子材等均係綠營總兵恐未能鈐
束旗兵該處逼近賊氛正當防勦喫緊之時京口
副都統一缺關繫緊要著都興阿於揚州軍營內
揀派得力旗員飭令迅赴鎮江暫行署理管理該
駐防旗營事務並著於江北軍營應升副都統各
旗員內擇其材力出衆戰功較著者酌保數員候

旨簡用現在寶堰白兔等處賊黨屬集意圖直撲
鎮城該處防剿喫緊揚州與鎮城相距密邇僅隔
一江該將軍務當不分畛域隨時偵探緩急相機
策應以固江南門戶

上諭內閣曰署江甯將軍巴棟阿由黑龍江協領歷
任甯古塔京口副都統署理江甯將軍督辦鎮江
軍務本年春夏以來逆匪疊撲鎮江府城該署將

軍督隊防剿不辭勞瘁茲以積勞身故悼惜殊深
巴棟阿著從優照將軍例賜卹應得卹典該衙門
察例具奏任內一切處分悉予開復並著查明該
署將軍子嗣幾人俟服闋後由該衙門帶領引見
候朕施恩

上又諭內閣曰都興阿著調補江甯將軍荊州將軍
著多隆阿補授現在江北安徽軍務緊要該將軍

等著仍在各該處辦理軍務毋庸來京請訓

上又諭內閣曰甘肅西甯鎮總兵馮子材著督辦鎮江軍務前任陝西陝安鎮總兵馬德昭著幫辦馮子材軍務

十六日辛未毓科奏言逆首李秀城自撫州等處

敗竄後於八月十二日率衆攻撲廣信府城經總兵鮑超統兵追擊道員屈蟠等登陴固守十

三至二十等日各營分門出戰斬擒甚多並擊
退攻城各賊二十一日李秀城親率大股分撲
各門我軍開礮轟擊斃賊百餘名乘夜焚燒賊
館數十處殺賊一千餘名賊始退卻二十三日
官兵過河直擣賊巢適鮑超等軍馳至水陸攻
擊立將城外賊壘一律踏平賊勢大潰我軍追
剿十餘里擒斬九百餘名廣信城圍立解敗匪

竄撲廣豐縣城復有另股匪衆前來援應經道員段起等兩路夾攻逆匪奔潰立解城圍其分撲玉山縣之賊亦經道員王德榜等分隊出戰先後殺賊五百餘名平毀賊壘十餘座逆衆奪路狂奔我軍乘勝追殺斃賊千餘名玉山城圍亦解臣查此次官軍殲除賊匪實屬異常出力除鮑超係二品大員應如何獎敘之處出自

聖裁其道員屈蟠等應行開列仰懇

天恩俯准給予獎勵陣亡之都司銜守備張恆彩等
應請

飭部照例議卹其餘出力之官紳弁勇及陣亡之各
弁勇等容臣查明另行辦理奏入

上諭內閣曰賊匪攻撲廣信等城先後經官軍擊退
提督鮑超著交部從優議敘其尤爲出力之道員

屈蟠等均著照所請交部從優議敘副將李佑厚
著以副將儘先補用參將伊凌阿著以副將補用
遊擊哈必發著以參將卽選都司段華等均著免
補都司以遊擊補用其餘出力官紳弁勇著准其
擇尤保奏陣亡之都司銜守備張恆彩等均著交
部分別議卹其餘陣亡各弁勇著飭科查明請卹
同日馮子材奏言逆首陳玉城厚集賊衆圖撲

鎮城臣卽挑選馬步隊伍令總兵陶茂森等帶
赴馬陵直搗賊巢令總兵富陞等從旁截剿又
派副將黃朝恩等於接仗時專擊陳逆十月初
八日夜我軍乘霧進攻賊衆蠡擁出撲並分股
抄襲我軍之後陳逆率衆來戰我軍四面兜剿
該逆左右衝突棄馬而遁賊衆大敗臣查該逆
狡悍異常此番大受懲創僅以身免勢必糾合

死黨再圖報復臣惟有激勵將士加意嚴防如
機有可乘卽當盡力剿洗奏入報

聞

同日翰林院侍講學士顏宗儀奏言上年金陵
逆匪竄踞蘇常蔓延兩浙兩江總督曾國藩整
師而出克復城池而江蘇巡撫薛煥浙江巡撫
王有齡至八一年之久捷奏無聞一則久駐海

濱處偏隅以自固一則專防省會顧他郡而未
遑萬一杭城有失上海豈能獨安若再遷延日
久必致貽誤大局應請

飭下議政王密查該兩撫能否勝任奏明辦理庶於
東南軍務有益

顏宗儀又奏言用兵以來惟楚兵最勇而善馭
楚兵者惟曾國藩最著現在東南軍務需才孔

亟可否

飭下曾國藩於軍營中擇其智勇兼全堪勝封疆將帥之任者酌保數員聽候

簡用奏入

上命議政王軍機大臣傳諭曾國藩曰翰林院侍講學士顏宗儀奏東南軍務緊要請嚴飭督兵大員速籌進剿並請密查江浙撫臣能否勝任江蘇巡

撫薛煥前在蘇州府任內聲譽頗著及升任上海
道辦理關稅各事宜亦臻妥協惟該省軍務正當
喫緊督帶兵勇或非所長且朕聞該撫在上海偏
隅自固日事晏安上海離城三十里卽有賊壘官
吏奔競如常如果屬實卽不能勝此重任浙江巡
撫王有齡頗有才具前任蘇藩時雖尙能籌辦軍
餉惟於浙撫一缺未知能否勝任以上二員均著

曾國藩悉心察看據實具奏現在東南軍務未平
需才孔亟該大臣久歷戎行見聞較廣著擇其智
勇兼全堪勝封疆將帥之任者酌保數員聽候簡
用

同日刑科給事中高延祐奏言杭州將軍瑞昌
浙江巡撫王有齡督辦軍務以來將及二載府
縣紛紛失守莫展一籌幾有坐以待斃之勢刻

下賊偪紹甯二郡省城危在呼吸浙省設有他
虞賊勢愈熾曾國藩一軍獨力難支東南大局
何堪設想查瑞昌樸誠素著惜乏智謀王有齡
但知理財不嫻將略其所信任屬吏皆係貪鄙
之徒惟以掊克夤緣爲事不以保惠訓練爲心
帶兵將弁如張玉良等擁兵觀望動輒挾制本
年四月閒金華失守張玉良兵勇恣情搶掠萬

目共睹該將軍等一味優容竟不申明軍律似此督率無方豈能濟事臣愚以爲當今將材多在楚營誠得如左宗棠者統率一軍來浙畀以封疆重權與兩江督臣曾國藩互相應援庶幾浙省可保郡縣可復可否請

旨將浙省軍務兼歸曾國藩督辦並請

飭令議政王軍機大臣就楚營帶兵大員內公舉一

人請

旨簡授浙江巡撫專督浙軍勦賊其現任巡撫王有齡或另行

簡用出自

聖裁

同日署國子監司業馬壽金奏言江蘇巡撫薛煥屢次奉

旨派員押解何桂清到京竟敢有意抗違延不拏解復
以收復蘇常專摺保奏顯係不允所請卽無收
復蘇常之日跡近要挾且聞該撫在上海娛情
古玩不理軍務實不勝封疆重任至總辦糧臺
之金安清聲名狼籍行止卑污恃與薛煥拜認
師生侵蝕糧餉兵民嘖有怨言應請

旨一併查辦均奏入

上命議政王軍機大臣傳諭曾國藩曰給事中高廷
祐奏瑞昌素乏智謀王有齡信任屬吏多係貪鄙
之徒將弁如張玉良等擁兵觀望動輒挾制該將
軍等一味優容不敢申明軍律各等語浙省賊氛
日熾必得謀勇兼備大員統兵援救鮑超追剿賊
匪已抵廣信如江西全境肅清卽著該總兵前赴
浙江督兵進剿左宗棠一軍能否抽撥並著曾國

藩相機籌辦王有齡屢被叅劾其平日不洽輿情
已可概見著該大臣仍遵前旨確切查明迅速具
奏又據署國子監司業馬壽金奏江蘇巡撫薛煥
娛情古玩不理軍務及金安清拜認師生侵蝕糧
餉各節並著會同藩確切查明一併據實覆奏
上諭內閣曰前據薛煥奏革員何桂清患病未痊且
有應辦事件暫緩起解當諭令該撫轉飭該革員

起緊妥辦俟有頭緒仍著派員解京迄今數月辦理尚無成效何桂清係革職拏問之員豈可任其藉端延宕著曾國藩派委幹員前往江蘇迅將該革員押解來京聽候審訊

十八日酉癸瑞昌王有齡奏言逆首李秀城勾合

江西湖坊踞賊竄入浙境侍逆李侍賢大股盤踞金華一帶現已攻陷嚴州而甯國股匪復從

千秋關等處蠶擁而來餘杭新城均已不守距
省不過二三十里浙江兵力本單今又添悍賊
二十餘萬勢益危急查幫辦江南軍務太常寺
卿左宗棠威望素著若令獨當一面必能力障
狂瀾惟有仰懇

天恩飭令左宗棠督辦浙江軍務在浙提鎮以下統
歸節制並兼程赴浙或由湖州會攻廣德或取

道嘉興進擣蘇常與曾國藩兩面夾擊分道並進庶無顧彼失此之虞

同日戶科掌印給事中林之望奏言軍興以來賊勢狡猾幾無完省而三江兩湖用兵最久總由各路統兵大臣意存畛域不能統籌大局呼吸相通以致此攻彼竄若以曾國藩經略三江兩湖俾得事權歸一挽回積習庶幾迅奏膚公

惟用人操之自

上非臣下所敢妄議應否

欽派經略之處出自

聖裁均奏入

上命議政王軍機大臣傳諭曾國藩曰逆首李秀城
及江西湖坊等處之賊盡驅入浙加以侍逆李侍
賢等盤踞金華一帶現已攻陷嚴州府城及浦江

等縣勢必直撲省城旁竄甯紹幾於全浙糜爛其
患曷可勝言著曾國藩卽飭左宗棠帶領所部兼
程赴浙督辦軍務浙省提鎮以下統歸節制挽救
東南大局至都興阿現在江北袁甲三現在皖北
遇有緊要軍務並著曾國藩諭令該地方文武等
仍遵都興阿等調遣不得稍涉玩視

上又命議政王軍機大臣傳諭袁甲三都興阿曰本

日降旨命曾國藩統轄江蘇安徽江西浙江軍務
所有四省巡撫提鎮悉歸節制至皖北江北仍責
成袁甲三都興阿辦理該大臣等務當督同李世
忠賈臻等於地方防剿事宜相機妥辦不得稍涉
推諉該處地方文武諒亦時有調遣之處已諭知
曾國藩飭令該文武等仍遵都興阿等調遣嗣後
遇有緊要軍情著袁甲三等仍會商曾國藩妥籌

辦理以期周密該大臣等受國厚恩惟當共濟艱
難力圖埽蕩毋許各存意見致誤事機

上諭內閣曰欽差大臣兩江總督曾國藩著統轄江
蘇安徽江西三省並浙江全省軍務所有四省巡
撫提鎮以下各官悉歸節制浙江軍務著杭州將
軍瑞昌幫辦並著曾國藩速飭太常寺卿左宗棠
馳赴浙江勦辦賊匪浙省提鎮以下各官均歸左

宗棠調遣

瑞昌王有齡又奏言賊匪圍攻浦江縣城經總兵文瑞等帶隊迎擊疊獲大勝嗣因該逆愈聚愈衆我軍被圍遂於八月二十三日浦江縣城失守該逆復率大股直撲五指山等處金華大股踵至米興朝等迎勦失利義烏東陽於二十六七等日相繼被陷侍逆李侍賢率衆屯踞牌

頭復由小石坎等處竄往嚴州而江西股匪又
由廣信一路突入浙境陸續赴嚴張玉良固守
嚴城業經數十日該逆屢攻不動八月初五日
以後賊船逐潮渡河分屯七郎廟等處意欲斷
我糧道臣等先派副將況文榜等赴援復於無
可抽撥之中調遊擊李陞元等水陸各軍前往
助剿查浦江被圍五十餘日糧盡援絕以致失

事該縣帶兵各員情尙可原合無仰懇

天恩免其置議至發往軍臺之已革總兵米興朝及
暫行革職之副將吳再升均係獲咎之員此次
節節潰退連失東義二城厥咎較重應請

旨將米興朝改發新疆效力贖罪吳再升拔去花翎
撤銷巴圖魯名號以守備降補其浦江縣知縣
恩福於失守之前先行出城乞援未能隨同固

守城池應請革職拏問署東陽縣知縣張用錫
於失守後縋城而出集團勦賊尙非聞警先逃
應請暫行革職仍責令勸辦團練會同官軍進
剿稍贖前愆署義烏縣知縣甘履祥越境交印
希圖規避處分應與此外文武各員容臣等查
明叅辦奏入

上諭內閣曰浦江被圍日久嗣以糧盡援絕遂致失

事該縣帶兵各員情尙可原均著免其置議已革
總兵米興朝暫革副將吳再升節節潰退以致義
烏東陽二城疊陷厥咎甚重米興朝本係發往軍
臺之員著改發新疆效力贖罪吳再升著拔去花
翎撤銷巴圖魯名號以守備降補浦江縣知縣恩
福於失守縣城之前先行出城未能隨同守禦著
革職拏問署東陽縣知縣張用錫雖無聞警先逃

情事惟不能力保城池究有應得之咎著暫行革職仍責令勸辦團練會同官軍進剿以贖前愆署義烏縣知縣甘履祥越境交印實屬有心規避該員應得處分及此外文武各員下落均著瑞昌王有齡查明分別叅辦仍著督飭各軍分投進剿迅圖克復各城毋任久踞

瑞昌王有齡又奏言逆匪李侍賢等圍攻嚴州

八月十六日分股在烏石灘等處連環築壘逼近外濠提督張玉良挑選精銳衝撲賊營該逆突由山頭衝下我軍腹背受敵且戰且退賊由南門越城而入經副將羅大春擊退守至十七日力盡援絕該副將身被數傷率領將士突圍而出嚴州府城遂陷其甯國新城之賊由幽嶺關等處逼近餘杭署知縣吳滢督團堵禦該逆

繆擁而至衆寡不敵迎戰失利餘杭縣城亦於
十七日失守該逆於城外連紮營卡並分股至
倉前等處焚掠查此次嚴州被圍兩月張玉良
羅大春等以援絕矢亡遂致失事尙非防守不
力可否仰懇

天恩與尙未抵任之知府仲廷機一併從寬免議署
建德縣知縣李長齡俟查明下落再行彙辦署

餘杭縣知縣吳滢本有革職留任處分現在督率民團隨同剿賊擬請暫緩撤革以觀後效臣等救援不及應請

旨交部嚴加議處仍當固守待援會籌堵剿以期力挽危局奏入

上命議政王軍機大臣傳諭瑞昌王有齡曰浙省軍情日急總由瑞昌等於帶兵將弁不能破除情而

認真督飭以至臨敵潰退城池相繼失守現在左
宗棠能否赴浙尙在未定該將軍等惟當就現有
兵力妥爲分撥嚴行扼截毋任賊匪再得深入張
玉良屢次僨事因念其從前克復杭城之功姑照
瑞昌等所請准予免議儻再不知奮勉致有挫失
定當重治其罪不能寬貸

上又命議政王軍機大臣傳諭慶端瑞璥曰浙江嚴

州浦江等府縣城池相繼失守情形危急自須速
籌援應著慶端等卽飭都司許忠標等星馳前進
並將臺灣壯勇速行調募勿再遲緩張玉良等屢
戰屢潰萬無足恃尤須得力大員前往統率卽著
於總兵曾玉明林文察二員中酌派一員星馳前
往浙江以資剿辦慶端兼轄浙省責無旁貸能否
親往督剿並著斟酌辦理

上諭內閣曰嚴州被圍兩月瑞昌等未能及早救援
實屬調度乖方瑞昌王有齡均著交部嚴加議處
張玉良自嘉興失利以後屢戰屢潰此次帶兵救
援嚴州復未能力殄賊氛姑念其衆寡不敵加恩
免其議處仍著曾國藩詳加察看如此後帶兵仍
不得力卽從重嚴叅治罪羅大春不能嬰城固守
亦屬咎有應得惟尙非有心潰退並著加恩免其

議處仍責令帶隊剿賊以觀後效署嚴州府知府
仲廷機尙未到任著一併從寬免議署餘杭縣知
縣吳滢於該縣失守後仍督率各鄉民團力圖克
復著暫緩撤任儘再不知愧奮卽行從嚴叅辦署
建德縣知縣李長齡及嚴州餘杭文武下落並著
該撫查明叅奏

同日劉長佑奏言潯州逆首陳開被追勢蹙欲

邀石逆共拒官軍因石逆爲楚軍所阻復由貴
縣潛遁橫州經知縣陳璠等設計誘擒並其黨
五人就地正法貴縣踞匪亦經蔣益澧設法招
撫當將縣城收復石達開聞陳逆伏法退至龍
山經劉坤一督率民團連破數寨追殺百餘名
該逆大股竄回融縣永東地方劉坤一繞出賊
前紮營浮石該逆搭造浮橋悉衆東渡我軍奮

勇前進刺斃悍賊數十人石逆受傷逃竄我軍
斬馘甚多臣查石逆久困粵西實因潯州餘孽
爲之羽翼又伺水陸各勇尙在潯州遂欲乘間
狂奔再肆猖獗茲得浮石之戰兇鋒大挫賊膽
已寒惟該逆蓄計他竄已非一日若改由懷遠
繞赴貴州則劉坤一所部楚勇勢必不能攔截
臣已飛咨湖南貴州設防會剿仍督飭楚勇越

境跟追此次擒獲陳逆出力之團紳擬彙入克復潯州案內從優請獎奏入

上諭內閣曰劉長佑奏潯州首逆就擒官軍堵剿石逆獲勝辦理尙爲得手著卽乘此聲威迅掃賊氛毋任他竄其出力紳團著准其彙入克復潯州案內保奏毋許冒濫